

ՀՀ ֆինանսների նախարարություն

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 4/3

2 փետրվարի 2016 թ.

Քննարկվեց Հովհաննես Մելքումյանի 29.12.2015 թ-ի գանգատը ՀՀ ՖՆ իրավաբանական վարչության պետի 21.12.2015 թ-ի թիվ 308620/02 որոշման դեմ:

Հովհաննես Մելքումյանի գանգատում բերված փաստարկները.

Ի պատասխան ՀՀ ֆինանսների նախարարության իրավաբանական վարչության պետի 2015թ-ի դեկտեմբերի 21-ի թիվ 308620/02 որոշման Հովհաննես Մելքումյանը հայտնում է, որ ամբողջությամբ առարկում է նշված որոշման դեմ:

ՀՀ վարչական իրավախախտումների վերաբերյալ ՀՀ օրենսգրքի 37 հոդվածի համաձայն. «Վարչական տույժը կարող է նշանակվել իրավախախտումը կատարվելու օրվանից ոչ ուշ, քան երկու ամսվա ընթացքում, իսկ շարունակվող և տևող իրավախախտման դեպքում՝ այն բացահայտվելու օրվանից երկու ամսվա ընթացքում»: Իսկ 169.1 հոդվածի համաձայն տուգանքի նշանակման համար հիմքը համարվում է հաշվարկը հարկային մարմիններ սահմանված ժամկետում չներկայացնելը, այլ ոչ սահմանված ժամկետից հետո չներկայացնելը կամ ուշ ներկայացնելը, ուստի նշված խախտումը շարունակվող և տևող չէ:

Հարկ է նշել նաև, որ խախտումը վերաբերում է «Սթրիմ ֆորս» ՍՊԸ եկամտային հարկի և սոցիալական վճարի հուլիս ամսվա հաշվարկի ուշ ներկայացնելուն, որը պետք է ներկայացվեր մինչև սույն թվականի օգոստոսի 20-ը: Այս դեպքում խախտումը ունի կոնկրետ կատարման օր (հաշվարկը հարկային մարմիններ ներկայացնելու սահմանված ժամկետ), այն է՝ օգոստոսի 21-ը: Հետևապես խախտումը կատարվել է կոնկրետ այդ օրը և հարկային մարմիններին այդ օրը իսկ պետք է հայտնի լիներ նշված խախտման մասին: Սակայն, խախտումից մինչև վարչական տույժ նշանակելու որոշումը անցել է ավելի քան երկու ամիս:

Ելնելով վերոգրյալից՝ Հովհաննես Մելքումյանը խնդրում է վերացնել ՀՀ ֆինանսների նախարարության իրավաբանական վարչության պետի 2015թ-ի դեկտեմբերի 21-ին կայացրած թիվ 308620/02 որոշումը:

ՀՀ ֆինանսների նախարարության հարկային և մաքսային մարմինների գանգատարկման հանձնաժողովի եզրակացությունը.

ՀՀ ՖՆ հարկային և մաքսային մարմինների գանգատարկման հանձնաժողովը (այսուհետ նաև Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության:

Քննարկման ընթացքում նշվեց, որ ՀՀ ՖՆ իրավաբանական վարչության պետը, քննելով 21.12.2015թ-ի թիվ 3108 վարչական իրավախախտման վերաբերյալ արձանագրությունը և կից նյութերը պարզել է, որ «Սթրիմ ֆորս» ՍՊԸ տնօրեն Հովհաննես Մելքումյանը սահմանված ժամկետում չի ներկայացրել 2015 թ-ի հուլիս ամսվա եկամտային հարկի և սոցիալական վճարի հաշվարկը, որի համար նախատեսված է պատասխանատվություն:

Նկատի ունենալով, որ արարքը նախատեսված է «Վարչական իրավախախտումների վերաբերյալ» ՀՀ օրենսգրքի 169.1-րդ հոդվածի 2-րդ մասով, ուստի ղեկավարվելով նույն օրենսգրքի 32-րդ հոդվածի 2-րդ մասով, 244.2-րդ, 281-րդ հոդվածներով և 282-րդ հոդվածի 1-ին կետով ՀՀ ՖՆ իրավաբանական վարչության պետի կողմից 21.12.2015 թ-ին ընդունվել է թիվ 308620/02 որոշումը Հովհաննես Մելքումյանի նկատմամբ վարչական տույժ նշանակելու մասին՝ գումարով 20.000 դրամի չափով:

Սույն գործում առկա ապացույցների ուսումնասիրության արդյունքում Հանձնաժողովը եկավ եզրակացության, որ Որոշումը կայացվել է «Վարչական իրավախախտումների վերաբերյալ» ՀՀ օրենսգրքով նախատեսված պահանջների խախտմամբ, հետևյալ պատճառաբանությամբ.

«Վարչական իրավախախտումների վերաբերյալ» ՀՀ օրենսգրքի 37-րդ հոդվածի համաձայն. «Վարչական տույժը կարող է նշանակվել իրավախախտումը կատարվելու օրվանից ոչ ուշ, քան երկու ամսվա ընթացքում, իսկ շարունակվող և տևող իրավախախտման դեպքում՝ այն բացահայտվելու օրվանից երկու ամսվա ընթացքում, բացառությամբ սույն հոդվածով նախատեսված դեպքերի»:

Տվյալ դեպքում Հովհաննես Մելքումյանը վարչական պատասխանատվության է ենթարկվել 2015 թ-ի հուլիս ամսվա եկամտային հարկի և սոցիալական վճարի հաշվարկը սահմանված ժամկետում չներկայացնելու համար:

1. «Եկամտային հարկի մասին» ՀՀ օրենքի 13-րդ հոդվածի 2-րդ մասի համաձայն հարկային գործակալները պարտավոր են յուրաքանչյուր ամսվա համար այդ ամսվան հաջորդող ամսվա 20-ից ոչ ուշ բացառապես էլեկտրոնային եղանակով հարկային մարմին ներկայացնել եկամտային հարկի ամփոփ հաշվարկ:

Վերոգրյալ իրավանորմի դրույթներից հետևում է, որ քննարկվող դեպքում Հովհաննես Մելքումյանն իրավախախտումը կատարել է 2015 թ-ի օգոստոսի 21-ին, սակայն վարչական տույժը նշանակվել է միայն 2015 թ-ի դեկտեմբերի 21-ին: Այսինքն, վարչական տույժը նշանակվել է «Վարչական իրավախախտումների վերաբերյալ» ՀՀ օրենսգրքի 37-րդ հոդվածով նախատեսված ժամկետի խախտմամբ, այն է՝ իրավախախտումը կատարվելու օրվանից երկու ամիս հետո ընկած ժամանակահատվածում:

Ելնելով վերոգրյալից և ղեկավարվելով «Վարչարարության հիմունքների և վարչական վարույթի մասին» ՀՀ օրենքի 63-րդ հոդվածի 1-ին մասի դրույթներով Հանձնաժողովը գտնում է, որ Հովհաննես Մելքումյանի գանգատը ենթակա է բավարարման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի և «Մաքսային ծառայության մասին» ՀՀ օրենքի 37-րդ հոդվածի պահանջներով հանձնաժողովը

ո թ ո շ ու մ է՝

Բեկանել ՀՀ ՖՆ իրավաբանական վարչության պետի 21.12.2015 թ-ի թիվ 308620/02 որոշումը, իսկ գործը՝ կարճել:

Հանձնաժողովի նախագահ՝



Վ.ՄԻՐՈՒՄՅԱՆ